

湘痕閣詩稿

相
痕
闕

民國十九年
國曆書局印

余家昔有三祖姑皆事吟詠先大父曾取其詩刊入小倉山房全集中題曰袁氏三妹合稿嗣余姊輩亦有能詩者三一日琛華爲余長姊一日柔吉爲余堂姊一日黛華爲余再從堂姊彼時同居隨園中聯袂唱酬無間寒暑余最幼穉猶竊聞之厥後長姊就養山右喜甥輩已將琛華集付之剞劂惟柔吉乃及黛華兩姊以癸丑殉金陵失陷之難故詩稿並失心焉傷之亂定乃過天長崇氏子爲柔吉姊之姪孫輩幸以抄存湘痕閣詩詞稿見貽噫貞魂烈魄冥冥中竟有呵護者不然何以圖書盡失而此卷獨流存耶余以薄宦無力付梓今承同宗古香閣呈慨然以剞劂自任此等風誼近世幾不復聞矣感激涕淋敬以原稿授之並贅數行於卷末以識發潛闡幽之盛德云光緒丁亥冬月弟祖志翔甫氏識

叙

余於丁巳孟夏暫飄河曲蓬心不振蒿目多憂時與王子甘巖撫桑落以延娛折舜華而粹詠間披青牘坐遣朱明偶出袁柔吉女士詩相示曰此璧水之璇流玉臺之錦製也可無一言以弁之乎女士靈根淅水秀出倉山微蘭設悅之前銘菊垂簪之始金鑾曉筆披紫石以飛文織素秋絲纂青雲而落組博天公之笑早擅投壺騰邦媛之華爭爲下鏡旣而女牀載月壻浦栖雲銜鸞翼以爲綢拂龍賓而傳翰香芳琴好愁一日之分離雪夏雷冬祝千秋之共命

天長古名千秋縣

窈窕淑女如此良人樹草無憂將花何怨若夫匏

瓜命獨特居紂絕之天玉樹神摧竟瘞沉冥之壤當是時飛龍骨出不難畢命於投棺黃鵠詞哀故欲殉
恩以引玦而烏鳥則空巢待哺鳳雛則文襟方啼思一夕而九乖摩笄終忍扶寸田而尺宅銜闕奚辭孰
知八難無涯三辰有譴羊祜之金環頓盡澤蘭之彤管俱亡貞木無春葉黃凋以畢雨寒巖背曜石赤露
而還霜祚絕身單吁其悴矣至若大雷書遠傷雁去於賢昆白雪歌沈慟鸞吡於少妹悽愴山川之外邈
綿綿素之間則又觸緒停絃怨靡蕪而失夢含歎罷杼感桃葉而思歸者也當打槩石城之後屬傳烽江
渚之初疊起蒼鵝鹵騎則投鞭忽渡兵顏朱雀關門則棄鑰全開於時玉弩飛空聲動鄭元之里珠樓濺
血心傷李白之孫賦烏鵲以投臺靡他永矢效銀瓶之墜并此節終完嗟乎填精衛之冤滄溟尙淺汨娥
皇之魄湘水何深天以醉而多憎人以孤而益戾道稱與善復何言哉予幸爲男子竊三樂於榮期悼彼
佳人增四愁於平子同傷離亂爲綴斯文甘泉李肇增冰叔

崇節母傳

節母姓袁氏名嘉字柔吉浙江錢塘人爲隨園先生長孫女幼端慧父遲極鍾愛母沈本才媛教以詩神解獨超尤工倚聲長歸天長崇氏崇巨族多魏科碩學所適雲根茂才名一顯負才望伉儷甚篤早卒遺子二女一以奉姑撫孤不得遂殉夫志飲水茹檠盡孝盡慈無何二子殤姑亦逝煢然獨處與孤女形影相弔薄田數畝歲值屢祲不得已返隨園侍父母側代弟輩理家政怡怡如也會父母次第三弟夫婦均歿遺三孤撫如己子每當風宵雪夜一燈課讀儼若嚴師其時隨園先生所出遲公一支已中落嗣子通公一支頗溫飽家庭中多難言之隱乃縷述當年祖德痛陳目下艱虞勉勵三孤聲淚交迸二孤旋入泮一孤亦成立而孤女忽天所謂彼蒼之報施固如是耶余姑母其冢弟婦也道光丙午秋余以省試金陵入隨園拜見之餘蒙異目視涼秋九月芙蓉盛開召羣弟姪暨余開尊聯吟縱談今古極一時文酒之樂其獎掖後進類如此合肥梁氏慕其才請授女公子經卽儀徵阮孝廉恩海室也後南河于相山觀察延入署課諸女及愛妾而才名噪袁浦壬子夏余客浦上蒙招往見勉以亟歸赴試毋飄泊曠志兼助資斧至今感不能忘是冬歸隨園時粵逆已破楚東下江省無戰守備余作書敦促出山一再不報似有默阻之者癸丑春賊破金陵乃仰天太息謂一生獎獨守節命也卽死節亦命也投池水淺不死服阿芙蓉喘

二日乃死嗚呼烈矣同時隨園眷屬死者衆而節母爲尤慘僕嫗輩咸懷其慈泣裏以衾掩倉山下越十二年城復屍已不可復殮哀哉所著有湘痕閣詩詞稿未付梓甚矣哉造物之忌才也里巷庸女子嫁富室安樂畢世或適小康老死無險巇者衆矣而節母負才早寡且獨乃淬其志於辛勤阨塞中卒以身殉難豈才果不祥之物耶抑夙因有宜然者抑然而其節則千古矣秋風颯沓長夜寂寥懷私恩激公義用是蒼茫感喟而爲之傳

甘泉篤生王榮昌

題詞

金陵 凌志珪 竹泉

倉山風雅女孫枝快讀新編百首詩掃盡尋常塗抹習吟成恰好淺深時荒蘆斷鴈聲流耳落葉哀蟬感

沁脾

集中詠燕暨白燕前後落葉詩尤佳

寄語紅閨諸伴侶買絲只合繡袁絲自從鏡破復釵分楚雨酸風不忍聞雁斷

更番悲弟妹鸞孤半世痛夫君傷心眷屬同朝露回首鄉園隔暮雲淒絕掌珠偏早碎棠梨一樹小孤墳

丹徒

王榮昌 篤生

巾幘才華絕璇閨節烈奇露蘭胎慧性霜柏挺寒姿世族揚麻遠高門歷數基一身林下苦千載女中師

浙水芬連桂倉山瑞產芝佩瓊明習禮漱玉愛填詞紫石憑刊字紅牋擅詠詩彼姝追宋若佳婿得義之

鏡鑑花初發珠簾月乍移雙聲鸞共囀比翼鳳來儀擊鉢爭提耳揮毫更畫眉玉檀欒小別

所居室名金縷曲

相思管趙柔情合秦徐艷福宜香雲籠并蒂夢雨折交枝獨宿床空守呱啼襟未離生爲嫠婦早死以藐

孤遲壯匣捐脂盡縲車響素帷梅酸方雨泣苗秀忽霜萎璧碎珠沈運巢傾卵覆悲省親歡盡孝撫姪教

全慈紗授文宣業綾霏道韞辭欲綿名士緒再闢故山基畫荻同嚴母擗芹喜客兒家庭推屈姊妹姻戚舉

班姬憶昔承顏日新秋應試時隨園仙境入奧室異書披刮目欣傳祕論心細析疑棘闈祈鸞薦杏苑望

駒馳盧李才原敵潘楊誼夙知華年工鬪句涼夜共浮卮葉落瑤牋遞烟橫鐵笛吹驚亭臨水坐蟾魄隔
屏窺麟筆精褒貶驪壇妙主持搏霄愁鍛羽贈策惱歌驪自痛星亡曙常嗟霧掩曦寄生非久計謀食且
幽羈贊看紅妝執經從白髮咨袁江攜雀硯郎署擁臯比織錦珍蘇蕙摹碑法茂漪鴻儒驚典雅龍女惜
孤危愧我逢河湫依人悵路歧深憐籌借箸嘉貺助歸資義重羞輕薄恩多療渴饑金陵重返棹綺戶又
垂罨日黯積荒蝶烽狂照大旗寇鞭投竟渡士甲棄如遺豕突雄城破烏啼寶瑟墮磨笄紆慘怛仰藥矢
捐糜劫急哀難殮貞完只賸屍瘦肌攢穴畔怨魄叫天涯丹閣飛灰冷青峰宿草衰石街填渤海竹染悴
湘湄命也摧琴瑟天平厄縞綦鵠原傷殉難令弟小村宰上海殉難鵲塚悼分支骸未歸葬梨恨芳圖失棠餘幼影隨節母
有梨花白燕圖又月廊香夢蓉岡魂可返芙蓉岡在天長蓬島駕應羈牛媛誰鐫集螭磯允築祠良弓虛似續綽
圖則述女公子之幼緣也

楔待榮施冰操先靈慰徽音後嗣貽清風吟峻嶺卓立婉峨媚

陽湖
張縉英

三妹曾傳絕妙詞

謂小倉山房集
中袁家三妹詩

古懷清節亦如斯淚枯湘竹成斑後秋老倉山閉戶時骨肉摧殘悲夢

幻離騷哀怨繼風詩衆芳零落憑誰惜珍重虬松百尺枝

王希韞
若謝

淵淵家學溯真傳白雪陽春字字妍盟手不嫌千遍讀論心已在廿年前丁亥見秋海棠詩前歲始得見面每因飄泊愁

鴻雁閒把離懷托杜鵑鏡破釵分無限感湘痕一卷恨難捐讀罷君詩喚奈何清才如此命坎軻聰明

得福人間少舊句憔悴終身我輩多百載韶華原是夢半生歲月任消磨掌珠一粒擎難穩淚溢湘江並女

娥

朱慧貞浣芳

久聞絳帳賦申情垂老相逢意更縈共話此生同逝水不須開卷已吞聲女師合向文宣拜天問難從楚

郢麇讀罷玉臺慚鏡雪羨君彤管著修名

兄璜鶴塘

辛苦編成一卷詩織殘機杼淚千絲止輪福慧鷗波好才調何慚管仲姬

姪孫家鰲海秋

毛詩三百篇首載后妃作共姜古節婦柏舟意有託作詩非婦職此說乃大錯才與命相妨或亦命偶薄

吾宗數詩人罕見題黃鶴得之巾幘中今見湘痕閣隨園紹宗派才力未嫌弱芝蘭氣清芬芙蓉枝瘦削

發抒皆性情曾不事雕鑿陶詠任自然曾不受束縛貢才既如此而何傷落莫嗚呼雲根公在昔才藝博

湘痕閣詩稿

題詞

胡乃謝盛年一朝塵夢惡幸有雙瑠枝或者慰寂寞胡乃覆巢卵亦被鷗鵠攫人事不可知天道猶難度
日歸侍雙親藉奉庭闈樂胡乃歌哀哀悲風生泉壑往者姊妹行詩酒互酬酢胡乃風吹散天文一方各
凡諸軫軻境一一親領略離恨生死并人事今非昨落葉想歸根浮萍無住著見之於詩篇血淚縱橫落
擬古黃鶴辭悽惋更奚若

湘痕閣詩稿卷上

錢唐 袁嘉 柔吉

擬閨中四時詞

柳絲倦舞東風軟，緩踏蒼苔弓印淺。
隔宵香夢，買人痴闌，草闌花意先懶。
綺窗日日調胭脂，塗抹春寒九。
九時爲祝，封姨勸護，惜紆綃繫，徧百花枝。
菡萏香濃，池館靜，午睡初回，湘簾冷。
蠶華如雪，嫋雲鬟，悄對圓冰粧乍整。
丁丁蓮漏，甄紋移綠，沈堆滿，青琉璃。
凭欄驀地，兜團扇，三兩疎螢墮碧池。
蟬鳴疎柳，蟲吟壁露，濕海棠紅欲滴。
明蟾弄影，過銀牆，曝衣樓迴，飄橫笛。
靈鵲填河，渡羽車，榆星歷歷亂餘霞。
臨風爭試穿鍼手，得巧誰先笑語譁。
蕭蕭一夜寒聲送曉，起飛綿壓簷，重捲簾。
眞訝玉爲山，粧慵斜，蟬釵頭鳳鵲，鼎添香，裊篆烟。
雛鬟呵手貼花鈿，南枝漸透春消息。
瘦影何如人可憐。

清明

又值清明候，東皇釀物華。
綠眠烟外柳，紅顫霧中花。
拾翠招芳侶，嬉春駕小車。
水村山郭近，指點酒旗斜。
春日遊靈谷寺

飏蕩東風拂面輕，載將油壁趁新晴。
春浮芳草蓬蓬遠，路入桃花款款行。
玉版禪心參四座，金繩法乳證

三生山空已覺紅塵隔又聽疎鐘時一聲

送別華玉姑母回六合

慈顏小別動經年今日歸來喜欲顛春亦似知歡會好一分留在畫樓前
園林過雨正清和三五流鶯巧弄歌試向綠雲濃處去青山一角妬香螺
廚開櫻筍趁斜暉更有銀鱗入饌肥遮莫離歌聽不得心
隨帆影渡江飛

雨後荷亭夜坐

祛暑愛良夜雨過邀明月三兩素心人團坐水雲窟樓高接瓊霄亭古通瑤闕碧天淨如揩遙岑淡疑沒
徑深螢火流樹迴蟬聲歇冷翠侵蒼衣濃露沁花骨散髮招新涼臨風遐想發相期慕神仙迷津無寶筏

和胡湘秋

兆蘭

表妹春日病起詩

綠窗風靜鳥晴絲芳草淒迷冒蝶癡拾翠恰逢挑菜節踏青已負禁烟時病憎花氣垂簾早心怯春寒捲
幔遲寄語妝成休久坐任他雙燕語差池

風

吹徧桃花又楝花更番芳信報天涯能虛冷氣乘時令也扇陽和到物華江上暗催帆影動陌頭軟曳酒

旗斜泠泠習習來何處只隔琉璃不隔紗

花

芳譜採來各種妍聽呼小字便纏綿開經淺燠輕寒候養趁微雲淡雨天解語定邀名士賞生香合受美人憐金鈴繫徧珠旛護不逐春風落舞筵

雪

濕瓦無聲撲紙乾霏霏一夜糝成團梨花落處春無色蛺蝶飛來影亦寒凍合疎枝迷翠羽冷封樵徑失青巒瓊簫薰暖香醅熟人在重簾怯倚欄

月

碧海青天夜氣森何關圓缺問升沈清凌霜鏡涵秋影朗濯冰壺證素心花底閒邀還把酒桐陰小佇暫停琴臨風偷聽霓裳曲悟到前身感不禁

晴秋野眺

遠山收宿雨野水澹前溪楓葉留寒蝶人烟亂午鷄感時黃菊瘦惜別翠眉低且踐登高約明朝斗酒攜

風雪憶梅歌

飛廉行天天無色青女不歡素娥泣飛瓊仙人爲解嘲清辯滔滔霏玉屑依稀咳唾來九天詞鋒傾注如
璇源萬籟俱寂長空無烟皚然奪盡四山翠頓使峨眉不得爭鮮妍六雲歷落散復整傾耳爬沙聲漸緊
不知松外鶴歸來忽訝窗前蟾墮影前邨此際足精神美人未見心先春一醉羅浮夢初醒衝寒定有詠
花人我欲探花還載酒却怕枝高寒出手消寒戲作梅花圖呵筆塗來剛四九

偶感

寄語東鄰女臨妝莫效顰千秋無絕色悅目是佳人

幽居

徙居來深山築屋如斗大洞壑杳蒼冥林莽延虛籟謾松吟風泠泠石瀉瀨地僻絕塵囂身閒忘否泰
了悟清淨理默若元機會真味參酒中幽趣聆絃外千古賞心人淵明此爲最

擬古

颯颯西風寒皎皎秋月白三兩烏夜啼空庭墮黃葉對此甯無情往事回頭憶十三倚紅窗鴛鴦繡裙褶
十五不知愁慙嬖撲蝴蝶悠悠度歲華春晨復秋夕十七鳳簫鳴子歸調琴瑟向曉竭井臼親操手無力
入幕習機杼抽絲未能織小姑目斜瞋阿母顏微赤老嫗背喃喃爭嗤新婦拙從此卸鉛華荆布表容飾

書聲亂剪刀夜夜不忍歇何日探驪珠艷誇瓊林客只恐錦衣還鏡裏人非昔

題墨蘭

不共蘼蕪采松煤點染奇秋花君子佩香草美人辭擷露芳如襲凝烟蝶未知幽居空谷致幾費遶欄思

月夜遊西岡弔胡湘秋妹與黛華青姊王潤如瑾盟姊小芬儀吉兩妹同作

嬾春人更惜春宵三五嬋娟弄影遙清露漸凝莎徑滑碧山爭寫黛娥嬌謝庭詠好空陳迹湘女愁深賦大招夢裏芳魂會相見遊蹤重待驗來朝

哭外

一輪月墮畫眉窗從此鸞分影不雙鼓到哀音靈瑟冷醒來噩夢怒鐘撞松筠志凜看淩節梅柳春深記渡江可奈饑驅留不得夜深雪涕對銀釭小別依依怨莫舒而今長決問何如枉悲婦竟司晨令未卜兒能讀父書家少儋儲謀本拙心存寸草報終虛蓉城一去知難返頭白慈顏痛倚闥早年已抱蓼莪哀癡叔何曾善理財先輩俸餘非手散小庭花滿是親栽有情未遇傾城色無命難消絕代才囊底珠璣零落盡幾行贖墨付妝臺檢點殘編淚不收遶巡何事上眉頭觸來南浦春陰感并作西窗夜雨愁曾經

南浦春陰裏却憶西窗夜雨時乃夫子回石梁時寄余之作也黯澹青燈悲照影飛蓬綠鬢怕禁秋傷心水閣塵封久短竹無聲咽暮流

夫子好音每于冰雪律
閣中品笛徹夜不倦

長貧潦倒減梳妝病羽驚風倍可傷私典衣襦供藥餌親調口味作羹湯背人
常瀆宵分淚禱佛時焚月下香忍視并刀痕尙在三生短夢費思量 十七盈盈賦結襦八年靜好感分
離韶光已是生前負影事翻於痛後思花密難栖禽並命風高合斷樹連枝黔婁有婦空爲詠再奠椒漿
問可知

送外櫬歸葬天長作

生小離鄉作客居廿年飽讀五車書名場落拓桐棺返也算歸田賦遂初 愁雲幕壓鬱難開鉦鼓頻催
劇可哀爲問石城橋下水如何同渡不同回 昔年雙倚小蓬窗眉翠青山闕畫長此日一般同道路寒
烟慘霧斷人腸 心似冰寒淚眼枯幾番搔首向天呼此生誤我遲同穴堂上衰親膝下孤 華屋生存
夢未溫荒邱遽又葬吟魂平時傲俗知交少誰叩西州月下門

別墓

三尺無情土音容思渺漫昔時分手易此日別君難已忘人天隔還憂風露寒叮嚀休記憶菽水自承歡
零丁兒女小此去仗誰憐淪落家何在淒涼夢尙牽青燈留獨影紅淚泣韶年欲別難爲別荒郊起暮烟

春日感懷